

JUDUL : Mingguan Malaysia

TARIKH : Ahad, 26 Mac 2017

M/S : 17



**RASHIDI HASBULLAH (dua dari kanan) dan Nafisah Ahmad (dua dari kiri) melawat gerai Utusan Karya sempena program Singgah Santai@PNM di Perpustakaan Negara Malaysia, Kuala Lumpur semalam.**

## Terapkan budaya membaca dalam TN50

**KUALA LUMPUR 25 Mac** - Budaya membaca merupakan salah satu elemen yang perlu diterapkan dalam Transformasi Nasional 2050 (TN50) bagi melahirkan masyarakat yang berpendidikan dan berpengetahuan tinggi pada masa depan.

Timbalan Ketua Setiausaha (Kebudayaan) Kementerian Pelancongan dan Kebudayaan, Datuk Rashidi Hasbullah berkata, bahan bacaan dilihat mampu mendidik golongan belia masa kini untuk berfikir dengan lebih jauh dan kritis.

"Malah, bahan bacaan juga boleh dijadikan sebagai produk pelancongan, banyak maklumat yang boleh diperolehi oleh pelancong yang ingin mengetahui tentang negara kita," katanya ketika berucap merasmikan program Singgah Santai@PNM di Perpustakaan Negara Malaysia (PNM) di sini hari ini.

Yang turut hadir, Ketua Pengarah PNM, Datuk Nafisah

Ahmad dan Rektor Akademi Seni Budaya dan Warisan Kebangsaan (Aswara), Prof. Datuk Ir. Dr. Mohd. Rizon Juhari.

Program sehari itu membawa tema Lestari Hijau Komuniti Sejahtera bagi mempromosikan budaya membaca dan menjaga alam sekitar.

Antara aktiviti yang diadakan adalah bicara buku, masakan warisan Melayu bersama chef selebriti terkenal, Datuk Ismail Ahmad, pertandingan kraf tangan kreatif kitar semula, penulisan jawi, membaca manuskrip Melayu, jualan buku, jualan produk dan buah-buahan dari Lembaga Pemasaran Pertanian Persekutuan (FAMA) dan menukar barangan terbuang.

Turut menjayakan program tersebut adalah Jabatan Alam Sekitar, Taman Pertanian Universiti Putra Malaysia (UPM), Jabatan Muzium Malaysia, Alam Flora Sdn. Bhd. dan Utusan Karya Sdn. Bhd.